

吳伯雄
編

陳壽祺全集

④1



廣陵書社

陳壽祺全集

 廣陵書社

第四十一冊

卷二百之七明人物列傳福寧州……………一

卷二百之八明人物良吏傳福州府興化府……………一九

卷二百之九明人物良吏傳建寧府延平府汀州府……………一〇五

卷二百一十明人物良吏傳邵武府……………一六三

卷二百一十一明人物良吏傳泉州府漳州府福寧州武功傳……………一七九

卷二百一十二明人物道學傳儒林傳……………三〇七

卷二百一十三明人物文苑傳福州府興化府……………四一九

卷二百一十四明人物文苑傳建寧府延平府汀州府邵武府泉州府漳州府

福寧州……………四八五

重纂福建通志卷二百之七

人物

明福寧州列傳

本州陳宗顏

林愛民

游朴

寧德縣周斌

林聰

子景從弟

著著子文迪聰孫元慶元魁元慶子以謨曾孫師行

林遂

陳寓

陳袞

陳勛

子得

姚吳國華

福安縣陳琦

郭文周

本州

舊福寧縣并

陳宗顏字希賢操行端潔州士有望者皆出其門洪武中以人材

舉帝問曰官汝方面有何施為對曰臣為上為德為下為民稱旨

授陝西布政使多善政

林愛民字子之況之子也

況見孝義傳

嘉靖甲辰進士授戶部主事凡

三餉邊疆談形勝如指掌尋權稅九江舟至今卽啓關關故例救
溺貨者有賞愛民令救人者賞倍之出羨金置陶潛周敦頤祭田
還朝遷員外郎二十九年俺答大舉入寇京師戒嚴邊兵入衛乏
芻料尚書呼林員外助我乃率城夫馳收菽芻賴以不絕進郎中
筦銀藏時羽士方有寵歲費香金十七萬以兵事故不時給權璫
欲發老庫給之愛民不可曰老庫備非常誰敢發者以積忤謫興
國州州同署大治縣事縣當吳楚交寄莊仇殺累年不解愛民一
勘卽平之量移嘉興通判值倭變守北城樓四十日圍乃解屬縣
捐鄉舊無城愛民倡築工成而寇至以有城不被賊調保定均驛
爲省下邑金錢數千緡復爲戶部郎中擢廣東按察司僉事備兵
海北散珠盜百餘艘值朝命採珠率屬矢神不私一顆忤巡按罷

歸

游朴字太初父德字廷光將赴試母泣送之遂築室南陽不復進
取與弟廷奎友愛鄉里化之凡兄弟有爭者輒相譬曰不見游德
兄弟耶朴萬歷甲戌進士除成都推官入爲大理評事歷遷刑部
郎中三主法司無一冤獄任刑部者多師之擢湖廣參政分守承
天發大豪李天榮不法事論死竟以是投効歸性孝友與弟韶白
首同居老而彌篤人謂能世其家焉

寧德縣

周斌字質夫生而端重閒雅襟度夷曠尤孝友篤學經史百家靡
不諳貫洪武壬子舉鄉試授建寧教授時兵革甫息學制粗舉斌
修廢起敝嚴立教條作新士習每旦五鼓升堂飭勵諸生非公事

弗造郡縣長貳之室雲南平撰賀表有金幣之賜分典湖廣試得
士爲盛秩滿考最入京師帝召至便殿承顧問以質直見重拜中
都國子監司業約度明信諸生悅服踰年召還授齊府左長史輔
翼一以正道王加敬禮從王入覲享勞優厚旣還以母憂去官哀
毀卒少師楊榮少從斌遊斌器之授經條所疑難旁喻曲譬必明
晰而後已常語榮曰子器識可嘉宜益自勉惜予老弗及見爾之
樹立也

林聰字季聰父觀字善甫少孤事母孝舉洪武癸酉鄉貢任程鄉
教諭生徒多稱貸武豪稍負輒被辱觀爲疏陳豪勢戢斂嘗陳六
事稱旨旣以母老歸養邑田陷海爲民宿患疏以聞起餘姚教諭
考滿赴部被命勘徐州蝗災旣還當遷官陳乞舊職遂調玉山再

調江山致仕聰第正統己未進士授刑科給事中景泰元年進都
給事中時承平日久言路弗塞聰感激論事無所諱英宗北狩以
後益與同官葉盛矯厲奮發所彈劾皆切近內侍及當柄大臣多
因以下獄去者迨也先奉英宗還廷臣議迎駕或謂敵人變詐不
測一車足矣聰曰上皇北征爲宗社計也迎復禮宜厚英宗之北
狩也皇太后命立憲宗爲皇太子而以景帝監國及景帝卽位欲
易東宮命廷臣會議眾相顧莫敢發言聰首言皇太子無過不當
易不肯署名然竟不能阻此按照代典則引崔銑語謂聰攘人之善
東宮官屬本閒曹雖似遷實弛其權故商輅以爲言不未幾設東
得因此遂疑聰未嘗諫易儲而指諸書云云爲攘善也
宮官屬遷春坊司直郎明年春學士商輅言聰遇事敢言不宜以
有用之才置閒散之地乃復爲吏科都給事中也先遣使入貢書

稱大元田盛可汗聰言也先弒主僭號乃遣使於我試覘中國有
人否爾莫若待之常禮賜敕來使命歸語以君臣上下之分順逆
吉凶之道庶幾國體不失帝竟從大臣議稱可汗答之戶部侍郎
張睿國子祭酒劉鉉並用母喪奪情聰疏言侍郎六卿之亞祭酒
師儒之宗忠孝大節不可不盡乞令守制不聽復上言君親人道
大倫忠孝臣子大節未有忠君不由孝親者也禮臣有父母之喪
君三年不呼其門高皇帝定制父母之喪皆斬衰三年冒喪有禁
匪喪有罰所以扶綱常維世教至矣近年邊事寧謐在外諸臣已
不許奪情而在京猶視爲故事其弊必至貪戀名爵不顧廉恥子
道旣虧臣節安在請永除其令帝納之四年十一月所立太子卒
聰言今三尺童子念太上皇德請復立故太子明年三月以災異

條上八事言陛下宜虛己省躬戒玩好之蕩心嬪御之燕溺用度之過奢逸樂之忘返與爵濫施罰濫及又言唐虞三代無有釋道齋醮之事然而享年益高傳祚益永自漢以來或捨身祀佛或迎骨入禁供奉非不專而壽祚未必永二教無益明甚近者在京寺觀一月而幾齋旬月而幾醮甚至內府亦設供奉雖曰內帑實出民脂以爲爲民祈福而民艱自如以爲爲國禳災而天災屢見請悉停罷餘如禁私役軍士省輪班工匠皆深中時弊帝多採納正統中福建銀場額重聰恐生變請輕之時弗能用已果大亂及是復極言其害竟得減免聰居職久益蹇蹇以言自任思不負知獎諸司憚聰風裁而內閣及諸御史並以聰好論建弗善也王文尤惡之求其罪不得其年冬聰甥陳和爲教官欲得近地便養聰爲

言於吏部御史黃溥等遂劾聰挾制吏部并劾尚書王直阿聰章
下廷訊坐大臣專擅選法律論斬胡濙謂文曰給事中七品官也
而擬以大臣囑託公事也而擬以選法二者於律合乎且人臣以
宿怨殺諫官無乃不可遂不與疏歸稱疾不朝帝使太監興安問
疾對曰老臣本無疾聞欲殺林聰不覺驚悸興安入告高穀亦力
言之帝知聰被構遂得釋左遷國子學正英宗復辟超拜左僉都
御史賑山東饑詢拔賢吏散詣村落給食及醫藥活民一百四十
五萬天順二年九月進右副都御史江淮鹽盜橫行命往捕以便
宜禽戮渠魁數人餘悉解散指揮吳斂等受盜賂奏籍其家三年
秋母憂起復再辭不許四年曹欽反將士妄殺至割乞兒首報功
市人不敢出戶聰署院事令獲賊者必生致濫殺爲止錦衣官校

惡欽殺指揮遂杲悉捕欽姻識人知其冤莫敢直聰辨出之明年進右都御史七年代王越巡撫大同歲餘遇疾致仕再歲以故官起掌南院事兼提督操江掌院多不樂御史言事聰獨獎勵之或咎聰聰曰已既不言又禁他人言可乎十三年秋召爲刑部尚書尋加太子少保聰以舊德召用持大體秉公論不嚴而肅時望益峻及遼東巡撫陳鉞鎮守中官葉達總兵官歐信等屢失事被劾十五年命聰偕中官汪直定西侯蔣琬按狀直欲庇鉞而憚聰深敬禮以悅其意聰亦稍委蛇比具獄還達信及副將韓斌等十七人並貶秩奪俸而鉞獨逃罪論者惜焉十八年乞歸不得卒於位年六十八贈少保宏治中謚莊敏聰爲諫官嚴重不可犯自抗易儲之議直聲著海內人皆想望風采郡縣聞其名所至皆惶恐救

過不暇而聰實恂恂和易不爲嶄絕之行以故不肖者畏之而賢者多樂就焉景泰時士大夫激昂論事朝多直言率聰與葉盛爲之倡至再起則更爲溫厚謙抑與物無忤議者疑其迹涉浮沈而卒無少貶云子景用蔭官順天府治中從弟著字士彰成化四年舉人知浙江新城縣以廉自持從弟普字士周成化閒鄉人築龍潭尾壩水道經普園捨地百餘丈並捐貲充費鄉人德之爲立頌德祠著子文迪字廷吉宏治五年舉鄉試第一十八年成進士授刑科給事中有敢言名奉命清糧卒於廣西文迪學博識醇與弟文遷並工詩聰孫元慶元魁皆輕財好施元慶子以謨義行如其父曾孫師行以字行以貢生任教職所至皆有去思碑

林遂字元成宏治辛酉舉人歷安吉象山教諭正德甲戌成進士

授南大理評事轉寺副嘉靖初陳八事曰恆敬心遠邪佞容戇直公是非重守令謹刑罰修武備革弊俗帝皆嘉納之轉寺正擢湖廣按察司僉事賑襄沔饑仿曾鞏計口授錢法不足則請太和山香錢鎮守中官難之往復抗論卒如請除鄖陽部運徵賠之害革榔永老女不嫁之俗創巡司於麻城界河進四川副使稽餉築城防邊並有成績大工採木權貴欲取其餘執不與勞費大省歲饑檄郡縣修學或謂未便遂曰此范文正公遺意也後麥大熟長至丈巡撫欲以瑞進遂曰大寒之後必有陽春何足爲瑞不署名遷貴州參政致仕歸在四川時有獻金甌者卻之民爲建卻金亭

陳寓字時安成化己丑進士知休寧縣搜剔吏蠹片言折獄有達官謀民產持不與達官銜之寓不爲動數年邑大治遷南京刑部

主事進郎中詔求直言寓條陳南京庫藏門禁關隘抽分行市守備國學府衛諸弊事多涉權貴守備太監奪民蘆洲勘還之且劾其不法太監亦奏寓沾直要名朝廷遣官鞫之卒直寓尋以母老乞養歸孝宗立即家擢廣西按察副使行部所至苗獠避伏移湖廣會朝廷遣中官印烙抽分廠木寓上疏言內臣一出地方騷擾乞取回不報進山西按察使忤權貴九載不遷卒於官

陳褒字邦進寓弟子也父字字時清性清高自謂平生慕真隱而有山水真樂玩遊真境詩書真味吟咏真趣號五真居士褒第嘉靖癸未進士授御史會議祀興獻帝於太廟褒疏言今日之事實與周文王不同陛下承祖者也其序傳之武宗不宜復立禰廟尋乞終養十餘年起原官巡按江西夏言爲相欲毀民居以益苑囿

褒書諷止之人爲之危褒曰吾寧危一身不忍見百姓離析之慘也尚書霍韜歎曰真御史也卒以忤言謫韶州推官去之日父老攀轅畱其多袍再謫泗州州判久之稍遷慈谿知縣毀淫祠以祀吳闞澤唐房琯蓋有澤於邑者遷松江同知值新設青浦縣事悉委之經略縣成擢廣西按察司僉事時總督張岳方大征柳州馬平僮聞褒至喜曰事集矣遂檄褒率各州兵征剿平五都諸處功垂成值言再起爲相御史呂光珣希指劾褒遂罷

陳勛字世勉萬厯甲戌進士知餘姚縣餘姚簿書山積勛頃刻立剖諸當道有曲法相屬者不少徇遷南京刑部主事擢四川副使有鄉貴橫施於民捕其家人懲以法進廣東參政將吏獲海上民誣以大盜株連常數百人勛面鞠其僞盡釋之尋爲權貴所擠謫

官起廣西副使備兵左江是時川貴會征播州酋楊應龍勛簡土
司兵數千往援大破之川貴總督上其事會皮林蠻反遂晉參政
領監軍道協勦勛率二萬人生擒苗首其餘撫解萬計以冒暑深
入致疾卒論功贈太僕卿賜祭葬勛服官清節居鄉懿行皆人所
難及子得姚字仲虞博通經史文名噪一時天啓中選貢授和州
州同崇禎八年上官檄令防江得姚挾一僕往適賊寇和州圍城
七晝夜一夕風雪大作守者皆僵城破知州黎宏業被害得姚妻
尤氏罵賊不屈死得姚在鎮江聞難募勇士禦退之遂署州事州
經亂後加意撫循民賴以蘇去之日多攀轅號哭者家居甘澹泊
絕干謁鄉望如其父

吳國華字朝賓萬厯丙辰進士授行人遷兵科給事中天啓中闕